

«Segir dapli avantatgs che dischavantatgs»

Strategia d'energia 2050

DA GION NUTEGN STGIER/ANR

■ **Exponents da differentas partidas e da differentas organisaziuns èn s'exprimids ier a Cuira a favur da la votaziun naziunala en connex cun ina nova strategia d'energia. La strategia promova l'effizienz e la producziun da l'energia regenerabla indigena.** In comite grischun ed independent, «GEA a la strategia d'energia 2050», ha preschentà ier a Cuira las raschuns a favur da la votaziun federala dals 21 da matg 2017. La conferenza da medias ha gi lieu en la halla da l'interpresa da maschinas agricolas d'Andreas Mehli. Cun sia producziun d'energia regenerabla grazia a la puschna e la grascha tar gas da bio e carvun saja el in bun exempel che la producziun da quella energia funcziuna er en noss chantun, ha ditg *Andy Kollegger*, il co-president dal comite grischun che sustegna la strategia d'energia 2050.

Ella è identica cun in levgiament

Al la grupp grischuna ed independenta per in «gea» a la strategia d'energia 2050 appartegna er il cusseglier dals chantuns *Martin Schmid*. Suentar ch'il parlament haja fatg intginas correcturas merita quella in cler consentiment, ha ditg il parlamentari liberal. Per la forza idraulica che saja finansialmain e levmain donnegiada porta la strategia d'energia in levgiament, ha punctuà *Martin Schmid*. Las premias limitadas da la fiera e las contribuziuns per investiziuns sustegnan las grondas ovras idraulicas e dettina uschè il spazi d'agir necessari per investir, ha



Sustegn per la strategia d'energia 2050: (da san.) Andy Kollegger, Not Carl, Ernst Sax, Jürg Kappeler, Martin Schmid e Silva Semadeni.

FOTO G. N. STGIER

menziunà il cusseglier dals chantuns. «La strategia d'energia è in cumpromiss politic cun daplis avantatgs che dischavantatgs e quai cunzunt er per il Grischun», ha accentuà *Martin Schmid*. Ultra da quai saja ella er in grond sustegn per ils tschains d'aua.

Fieu e flomma per la strategia d'energia 2050 è er cussegliera naziunala

Silva Semadeni. Entras quella strategia d'energia suanda pass per pass la sortida da producziun d'energia nucleara privlusa, ha menziunà la parlamentaria naziunala. Gist en regiuns muntagnardas haja l'energia solara in immens potenzial da sa sviluppar, ha ditg *Silva Semadeni*. Ella ha er ditg che la forza d'aua restia grazia a la strategia d'ener-

gia 2050 la fermezza dal proviediment d'electricità e gist per noss chantun saja quel aspect da fitg gronda impurtanza. Tar la cumplettaziun da la forza idraulica e dal vent vegnan biotops da muntada naziunals schurmegiads e quai saja er in fatg positiv da la strategia d'energia 2050, ha menziunà *Silva Semadeni*.

Annualmain 120 milliuns francs

Per rinforzar la forza idraulica grischuna e per reducir la pressiuin sin ils tschains d'aua saja urgent da sustegnair la strategia d'energia 2050, ha menziunà *Not Carl*, l'antier president communal da Scuol. El è er al timun da la cuminanza d'interess da las vischnancas da concessiuns e gist per quellas sco er per il chantun saja da gronda valur er en il futur da retschaiver il tschains d'aua annual da 120 milliuns francs. Vegnissian quels stritgads tenor la veglia dals concerns da forza, per dus terzas, lura avess quai grondas consequenzas negativas per bleras vischnancas, per intginas vals ed er per il chantun, ha ditg *Not Carl*.

Nizzegiar il potenzial

A pled è er vegnì il deputà *Ernst Sax* che è era president communal da Sursaissa e da la Regiun Surselva. La strategia d'energia 2050 creeschia ina tscherta siertad da planisaziun e quai saja da gronda impurtanza per bleras vischnancas, per singulas regiuns, per ils chantuns ed er per la confederaziun. Cun investir vinavant en la forza idraulica, solara e regenerabla profiteschia cunzunt er il commerci indigen, quai che saja da preschent fitg custaivel, ha ditg *Ernst Sax*. Il Grischun haja premissas idealas per innovaziuns quai che pertutgia energias regenerablas, ha ditg il deputà *Jürg Kappeler*. Cun la nova lescha da svilup e cun la strategia d'energia 2050 vegnissian quellas premissas rinforzadas fitg, ha concludì *Kappeler*.